

Wanita bukan hamba nafsu

*Risalah
Islam beri
kemerdekaan
hakiki, tingkat
maruah manusia
tanpa mengira
gender*

B/H 20/9/12. ms 32.

Meningkap sejarah dunia, Presiden Amerika Syarikat ke-16, Abraham Lincoln, sering disebut sebagai tokoh yang bertanggungjawab menghapuskan sistem perhambaan di benua Amerika Utara.

Namun tidak ramai yang menghayati bagaimana sebenarnya risalah Islam yang disempurnakan melalui perutusan Rasulullah SAW membawa misi membebaskan manusia daripada episod kejaman perhambaan sesama manusia.

Semasa Rasulullah SAW diutuskan kepada kaumnya yang diselubungi kegelapan jahiliah, terdapat dua bentuk perhambaan sesama manusia mendominasi kehidupan masyarakat ketika itu.

Segolongan menjadi hamba tawanan perang selepas suku atau kaumnya tewas dalam peperangan sesama kabilah yang bermusuhan, sementara golongan wanita menjadi hamba sahaya yang meladeni nafsu syahwat kaum lelaki.

Sebagai hamba dan tawanan perang, wanita tidak mempunyai maruah diri, dihina, diperdagangkan ibarat hasil dagangan serta diwarisi ibarat harta pusaka.

Wanita di zaman jahiliah diperlakukan sesuka hati. Anak perempuan dita-

nam hidup-hidup untuk menutup malu dan aib. Seorang isteri boleh diwarisi oleh anak suaminya yang telah meninggal dunia dan boleh dijadikan barang dagangan atau satu warisan harta pusaka yang diperturunkan.

Pada zaman itu, wanita hanya untuk dilihat dan dinikmati, tiada ruang serta peluang untuk pandangan atau pendapatnya didengari serta sumbangannya dihargai. Sungguh hina dan rendah darjat status kaum wanita di mata masyarakat jahiliah.

Kedatangan Rasulullah SAW membawa sinar terang menyuluh hati manusia yang dicengkam kegelapan jahiliah. Peringkat awal misi, Rasulullah SAW memberi fokus menanamkan bibit akidah tauhid dan iman kepada Allah SWT, membersihkan jiwa manusia daripada mempersekutukan Allah.

Ajaran Islam menekankan keadilan Allah SWT yang menilai manusia ber-

dasarkan kualiti iman dan takwanya, bukan darjat kedudukan, kekayaan, harta, kecantikan atau gender seseorang. Keyakinan mengesakan Tuhan yang satu menghasilkan jiwa manusia merdeka, bebas dan tidak lagi terbelenggu.

Segala kepatuhan, pengharapan dan penggantungan hanyalah ditumpukan kepada Allah SWT. Hati yang dulunya sentiasa ketakutan, kebimbangan dan kegelisahan, menjadi tenang dengan keberanian.

Rasulullah SAW tidak menghasut hamba dan kaum wanita untuk bangkit memberontak menentang penindas yang selama ini menyeksa jiwa serta raga kedua kelompok ini. Tiada pergerakan revolusi berdarah dan kejam dicetuskan.

Apabila hamba dan wanita mulai menerima risalah Islam yang dibawa Muhammad SAW, sedikit demi sedikit

mereka meraihi keyakinan dan mempertingkatkan harga serta maruah diri.

Daripada kedudukan hamba manusia yang dipandang hina, kelompok tertindas ini perlahan-lahan memerdekakan diri dan membangunkan jiwa masing-masing untuk hanya mengabdikan diri kepada Allah SWT.

Penggantungan dan harapan mereka diserahkan sebulat-bulatnya untuk Allah. Sekalipun di mata manusia lain mereka dianggap hamba sahaya milik tuan mereka, hakikatnya hamba dan wanita yang menerima cahaya iman disebarkan Rasulullah SAW menempa kemuliaan dan kemerdekaan hakiki.

Daripada kedudukan yang rendah, iman kepada Allah meningkatkan harga diri manusia ke tahap tinggi yang tidak akan mampu dicabar sesiapa pun. Motivasi cetusan iman ini banyak dirakamkan dalam al-Quranul karim.

Firman Allah SWT: "Orang yang beriman dan tidak mencampuradukkan iman mereka dengan kesyirikan, mereka itulah orang yang mendapat keamanan dan petunjuk." (Surah Al-An'am, ayat 82)

Pada masa sama, golongan kaya yang sombong, takbur, bongkak menindas serta memperhambakan manusia lain yang dianggap lebih rendah dan hina, diingatkan oleh al-Quran dengan ancaman.

Firman Allah SWT: "Sesungguhnya orang yang menyombongkan dirinya dari menyembah Aku, akan masuk neraka jahanam dengan kehinaan." (Surah al-Mukminin, ayat 60)

Melalui tarbiah keimanan, Rasulullah SAW berjaya menghapuskan perhambaan sesama manusia dan menjuruskan ketaatan hanya kepada Allah SWT, yang Maha Esa dan Maha Terpuji.

Sementara yang sombong, bongkak, dididik supaya merasa kecil dan hina di hadapan Allah, yang ditindas dan diperlakukan sebagai hamba ditarbiah hanya takut kepada Allah semata-mata.



AL-QURAN

"Orang yang beriman dan tidak mencampuradukkan iman mereka dengan kesyirikan, mereka itulah orang yang mendapat keamanan dan petunjuk"

Surah Al-an'am (ayat 82)

"Sesungguhnya orang yang menyombongkan dirinya dari menyembah Aku, akan masuk neraka jahanam dengan kehinaan."

Melalui tarbiah keimanan, Rasulullah SAW berjaya menghapuskan perhambaan sesama manusia dan menjuruskan ketaatan hanya kepada Allah SWT, yang Maha Esa dan Maha Terpuji.

Sementara yang sombong, bongkak, dididik supaya merasa kecil dan hina di hadapan Allah, yang ditindas dan diperlakukan sebagai hamba ditarbiah hanya takut kepada Allah semata-mata.



**DR HARLINA
HALIZAH
SIRAJ**

Pengerusi
Jawatankuasa
Pembangunan
Sosial
Pertubuhan
Ikram Malaysia
(IKRAM)